

晉

書

列傳第一

晉書

御撰

后妃上

宣穆張皇后

景懷夏侯皇后

景獻羊皇后

文明王皇后

武元楊皇后

武悼楊皇后

胡貴嬪

諸葛夫人

惠賈皇后

惠羊皇后

謝夫人

懷王皇太后

元夏侯太妃

夫乾坤定位男女流形伉儷之義同歸貴賤之名異等若乃作配皇極齊體紫宸象玉牀之連後星喻金波之合義璧爰自夙古是謂元妃降及中年乃稱王后四人並列光于帝嚳之宮二妃同降著彼有虞之典夏商以上六宮之制其詳靡得而聞焉姬劉以降五翟之規其事可略而言矣周禮天子立一后三夫人九嬪二十七世婦八十御妻以聽王者內政故婚義曰天子之與后如日之與月陰之與陽由斯而譚其所從來遠矣故能母儀天寓助宣王化德均載物比大坤維宗廟敬其薦羞穹壤俟其交泰是以哲王垂憲尤重造舟之

禮詩人立言先獎葛覃之訓後燭流景所以裁其宴私房樂希聲是用節其容止履端正本抑斯之謂歟若乃娉納有方防閑有禮肅尊儀而脩四德體柔範而弘六義陰教洽於宮闈淑譽騰於區域則玄雲入戶上帝錫母萌之符黃神降徵坤靈贊壽丘之道終能鼎祚惟永胤嗣克昌至若儷極虧閑憑天作孽倒裳衣於衽席感眊側於弦望則龍漿結璽宗周鞠為黍苗鸞尾挺災隆漢墜其粉社矣自曹劉內主位以色登甄衛之家榮非德舉淫荒挺性蔑西郊之禮容婉孌合辭作南國之奇態詖謁由斯外入穢德於是內宣椒掖播晨牝之風蘭殿絕河雎之響永言彤史大練之範逾微緬視青蒲脫珥之猷替矣晉承其末與世汙隆宣皇創基功弘而道屈穆后一善勸侔於十亂洎乎太祖始親選良家既而帝掩紈扇躬行請託后採長白寔彰妬忌之情賈納短青踐覆亡之轍得失遺迹煥在綈紉興滅所由義同畫一故列其本事以爲后妃傳云

宣穆張皇后諱春華河內平皋人也父汪魏粟邑令母河內山氏司

徒濤之從祖姑也。后少有德行智識過人。生景帝文帝平原王幹南陽公主宣帝。初辭魏武之命。託以風痺。嘗暴書遇暴雨。不覺自起。收之家。惟有一婢見之。后乃恐事泄。致禍。遂手殺之。以滅口。而親自執爨。帝由是重之。其後柏夫人有寵。后罕得進。見帝嘗卧病。后往省病。帝曰。老物可憎。何煩出也。后慙恚。不食。將自殺。諸子亦不食。帝譙而致謝。后乃止。帝退而謂人曰。老物不足惜。慮困我好兒耳。魏正始八年崩。時年五十九。葬洛陽高原陵。追贈廣平縣君。咸熙元年追號宣穆妃。及武帝受禪。追尊皇后。

景懷夏侯皇后諱徽。字媛容。沛國譙人也。父尚。魏征南大將軍。母曹氏。魏德陽鄉主。后雅有識度。帝每有所爲。必豫籌畫。魏明帝世。宣帝居上。將之重。諸子並有雄才大略。后知帝非魏之純巨。而后旣魏氏之甥。帝深忌之。青龍二年。遂以鳩崩。時年二十四。葬峻平陵。武帝登阼。初未追崇。弘訓太后每以爲言。泰始二年。始加號謚。后無男生五女。

景獻羊皇后諱徽瑜泰山南城人父衛上黨太守后母陳留蔡氏漢左中郎將邕之女也后聰敏有才行景懷皇后崩景帝更娶鎮北將軍濮陽吳質女見黜復納后無子武帝受禪居弘訓宮號弘訓太后泰始九年追贈蔡氏濟陽縣君謚曰穆咸寧四年太后崩時年六十五祔葬峻平陵

文明王皇后諱元姬東海郯人也父肅魏中領軍蘭陵侯后年八歲誦詩論尤善喪服苟有文義目所一見必貫於心年九歲遇母疾扶侍不捨左右衣不解帶者父之每先意候指動中所適由是父母令攝家事每盡其理祖朗甚愛異之曰興吾家者必此女也惜不爲男矣年十二朗薨后哀戚哭泣發於自然其父益加敬異既笄歸于文帝生武帝及遼東悼王定國齊獻王攸城陽哀王邕廣漢殤王廣德京兆公主后事舅姑盡婦道謙沖接下嬪御有序及居父喪身不勝衣言與淚俱時鍾會以才能見任后每言於帝曰會見利忘義好事端寵過必亂不可大任會後果反武帝受禪尊爲皇太后宮曰崇化

初置宮卿重選其職以太常諸葛緒為衛尉太僕劉原為太僕宗正
曹楷為少府后雖處尊位不忘素業躬執紡績器服無文御浣濯之
衣食不參味而敦睦九族垂心萬物言必典禮浸潤不行帝以后母
羊氏未崇謚號泰始三年下詔曰昔漢文追崇靈文之號武宣有平
原博平之封咸所以奉尊尊之敬廣親親之恩也故衛將軍蘭陵景
侯夫人羊氏含章體順仁德醇備內承世胄出嬪大國三從之行率
禮無違仍遭不造頻喪統嗣撫育衆胤克成家道母儀之教光于邦
族誕啓聖明祚流萬國而早世殂隕不遇休寵皇太后孝思蒸蒸永
慕罔極朕感存遺訓追遠傷懷其封夫人為縣君依德紀謚主者詳
如舊典於是使使持節謁者何融追謚為平陽靖君四年后崩時年
五十二合葬崇陽陵將遷祔帝手疏后德行命史官為哀策曰明明
先后興我晉道暉章淑問以翼皇考邁德宣猷大業有造貽慶孤朦
堂構是保庶資復顧永享難老奄然登遐棄我何早沉哀罔訴如何
穹昊嗚呼哀哉厥初生民樹之惠康帝遷明德顧予先皇天立厥配

我皇是光作邦作對德音無疆愍予不弔天篤降殃日沒明夷中年
隕喪堯堯在疚永懷摧傷尋惟景行於穆不已海岱降靈世荷繁祉
永錫祚胤篤生文母誕膺純和淑慎容止質直不渝躬茲孝友詩書
是悅禮籍是紀三從無違中饋允理追惟先后勞謙是尚爰初在室
竭力致養嬪于大邦皇基是相謐靜隆化帝業以創內叙嬪御外協
時望履信居順德行洽暢密勿无荒劬勞克讓崇儉抑華冲素是放
雖享崇高歡嘉未饗胡寧棄之我將曷仰咨余不造大罰荐臻皇考
背世始踰三年仰奉慈親其無後艱凶災仍集何辜于天嗚呼哀哉
靈輜鳳駕設祖中闈輶輶動軫既往不追哀哀皇妣永潛靈暉進攀
梓宮顧援素旂屏營窮痛誰告誰依訴情贈策以舒傷悲尚或有聞
顧予孤遺嗚呼哀哉其後帝追慕不已復下詔曰外曾祖母故司徒
王朗夫人楊氏舅氏尊屬鄭劉二從母先后至愛母惟聖善敦睦遺
旨渭陽之感永懷靡及其封楊夫人及從母爲鄉君邑各五百户太
康七年追贈繼祖母夏侯氏爲滎陽鄉君

武元楊皇后諱豔字瓊芝弘農華陰人也父文宗見外戚傳母天水趙氏早卒后依舅家舅妻仁愛親乳養后遣他人乳其子及長又隨後母段依其家后少聰慧善書姿質美麗閑於女工有善相者嘗相后當極貴文帝聞而為世子聘焉甚被寵遇生毗陵悼王軌惠帝秦獻王東平陽新豐陽平公主

武帝即位立為皇后有司奏依漢

故事皇后太子各食湯沐邑四十縣而帝以非古典不許后追懷舅氏之恩顯官趙俊納俊兄虞女粲於後宮為夫人帝以皇太子不堪奉大統密以語后后曰立嫡以長不以賢豈可動乎初賈充妻郭氏使賂后求以女為太子妃及議太子婚帝欲娶衛瓘女然后盛稱賈后有淑德又密使太子太傅荀顗進言上乃聽之泰始中帝博選良家以充後宮先下書禁天下嫁娶使官者乘使車給騶騎馳傳州郡召充選者使后揀擇后性妬惟取潔白長大其端正美麗者並不見留時下藩女有美色帝掩扇謂后曰卞氏女佳后曰藩三世后族其女不可枉以卑位帝乃止司徒李胤鎮軍大將軍胡奮廷尉諸葛冲

太僕臧權侍中馮蓀秘書郎左思及世族子女並充三夫人九嬪之列司翼兗豫四州二千石將吏家補良人以下名家盛族子女多敗衣瘁貌以避之及后有疾見帝素幸胡夫人恐後立之慮太子不安臨終枕帝膝曰叔父駿女男胤有德色願陛下以備六宮因悲泣帝流涕許之泰始十年崩于明光殿絕于帝膝時年三十七詔曰皇后逮事先后常冀能終始永奉宗廟一旦殂隕痛悼傷懷每自以夙喪二親於家門之情特隆又有心欲改葬父祖以頃者務崇儉守初不有言近垂困說此意情益愍之其使領前軍將軍駿等自克改葬之宜至時主者供給葬事賜謚母趙氏為縣君以繼母段氏為鄉君傳不云乎慎終追遠民德歸厚且使亡者有知尚或嘉之於是有司卜吉窀穸有期乃命史臣作哀策叙懷其辭曰天地配序成化兩儀王假有家道在伉儷姜姬佐壘三妃為嬀仰希古昔冀亦同規今胡不然景命風虧嗚呼哀哉我應圖錄臨統萬方正位于內實在嬪嬙天作之合駿發之祥河嶽降靈啓祚華陽弈世豐衍朱紱斯煌續女惟

行受命溥將來翼家邦憲度是常緝熙陰教德聲顯揚昔我先妣
暉曜休光后承前訓奉述遺芳宜嗣徽音繼序無荒如何不弔背世
隕喪望齊無主長去蒸嘗追懷永悼率土摧傷嗚呼哀哉陵北旣窆
將遷幽都宵陳夙駕元妃其徂宮闈遏密階庭空虛設祖布紼告駕
啓塗服翬綸狄寄象容車金路瞻謁裳帳不舒千乘動軫六驥躊躇
銘旌樹表翼柳雲敷祁祁同軌爰爰蒸徒孰不云懷哀感萬夫寧神
虞卜安舫玄廬土房陶甕齊制遂初依行紀謚聲被八區雖背明光
亦歸皇姑沒而不朽世德作謨嗚呼哀哉乃葬于峻陽陵

武悼楊皇后諱苙字季蘭小字男胤元后從妹父駿別有傳以咸寧
二年立爲皇后婉嫕有婦德美映椒房甚有寵生渤海王早薨遂
無子太康九年后率内外夫人命婦躬桑于西郊賜帛各有差太子
妃賈氏妬忌帝將廢之后言於帝曰賈公問有勲社稷猶當數世宥
之賈妃親是其女正復妬忌之間不足以一生掩其大德后又數誠
厲妃妃不知后之助已因以致恨謂后構之於帝忿怨彌深及帝崩

尊為皇太后賈后凶悖忌后父駿執權遂誣駿為亂使楚王瑋與東安王繇稱詔誅駿內外隔塞后題帛為書射之城外曰救太傅者有賞賈后因宣立太后同逆駿既死詔使後軍將軍荀悝送后于永安宮特全后母高都君龐氏之命聽就后居止賈后諷群公有司奏曰皇太后陰漸姦謀圖危社稷飛箭繫書要募將士同惡相濟自絕于天魯侯絕文姜春秋所許蓋以奉順祖宗任至公於天下陛下雖懷無已之情臣下不敢奉詔可宣勅王公於朝堂會議詔曰此事更詳之有司又奏駿藉外戚之資居冢宰之任陛下既居諒闇委以重權至乃陰圖凶逆布樹私黨皇太后內為脅齒協同逆謀禍亂既彰背捍詔命阻兵負眾血刃宮省而復流書募眾以獎凶黨上背祖宗之靈下絕億兆之望昔文姜與亂春秋所貶呂宗叛戾高后降配宜廢皇太后為峻陽庶人中書監張華等以為太后非得罪於先帝者也今黨惡所親為不母於聖世宜依孝成趙皇后故事曰武帝皇后處之離宮以全貴終之恩尚書令下邳王晃等議曰皇太后與

駿潛謀欲危社稷不可復奉承宗廟配合先帝且貶尊號廢諡金墉城於是有司奏請從是等議廢太后爲庶人遣使者以太牢告于郊廟以奉承祖宗之命稱萬國之望至於諸所供奉可順聖恩務從豐厚詔不許有司又固請乃可之又奏楊駿造亂家屬應誅詔原其妻龐命以慰太后之心今太后廢爲庶人請以龐付廷尉行刑詔曰聽龐與庶人相隨有司希皇后旨固請乃從之龐臨刑太后抱持號叫截髮誓額上表詣賈后稱妾請全母命不見省初太后尚有侍御十餘人賈后奪之絕膳而崩時年三十四在位十五年賈后又信妖巫謂太后必訴冤先帝乃覆而殯之施諸厭劾符書藥物永嘉元年追復尊號別立廟神主不配武帝至成帝咸康七年下詔使內外詳議衛將軍虞潭議曰世祖武皇帝光有四海元皇后應軋作配元后旣崩悼后繼作至楊駿肆逆禍延天母孝懷皇帝追復號謚豈不以鮒殛禹興義在不替者乎又太寧二年臣忝宗正帝譜泯棄罔所循按時博諮舊齒以定昭穆與故驃騎將軍華恒尚書荀松侍中荀邃

因舊譜參論撰次尊號之重一無改替今聖上孝思祇肅禮祀詢及
羣司將以恢定大禮臣輒思詳伏見惠皇帝起居注羣臣議奏列駿
作逆謀危社稷引魯之文姜漢之呂后臣竊以文姜雖莊公之母實
爲父讎呂后寵樹私戚幾危劉氏按此二事異於今日昔漢章帝竇
后殺和帝之母和帝即位盡誅諸竇當時議者欲貶竇后又后之士
欲不以禮葬和帝以奉事十年義不可違臣子之道務從豐厚仁明
之稱表於往代又見故尚書僕射裴頤議悼后故事稱繼母雖出追
服無改是以孝懷皇帝尊崇號謚還葬峻陵此則母子道全而廢事
蕩革也于時祭於弘訓之宮未入太廟蓋是事之未盡非義典也若
以悼后復立爲宜則應配食世祖若以復之爲非則譜謚宜闕未有
位號居正而偏祠別室者也若以孝懷皇帝私隆母子之道特爲立
廟者此苟崇私情有虧國典則國譜帝諱皆宜除棄匪徒不得同祀
於世祖之廟也會稽王昱中書監庾冰中書令何充尚書令諸葛恢
尚書謝廣光祿勳留擢丹楊尹郝融護軍將軍馮懷散騎常侍鄧逸

等咸從譚議由是太后配食武帝

左貴嬪名芬兄思別有傳芬少好學善綴文名亞於思武帝聞而納之泰始八年拜脩儀受詔作愁思之文因爲離思賦曰生蓬戶之側陋兮不閑習於文符不見圖畫之妙像兮不聞先哲之典謨既愚陋而寡識兮謬忝廁於紫廬非草苗之所處兮恒休惕以憂懼懷思慕之忉忉兮兼始終之萬慮嗟殷憂之沉積兮獨鬱結而靡訴意慘憤而無聊兮思纏綿以增慕夜耿耿而不寐兮魂憧憧而至曙風騷騷而四起兮霜皚皚而依庭日曛曖而無光兮氣瀏慄以冽清懷愁戚之多感兮患涕淚之自零昔伯瑜之婉孌兮每綵衣以娛親悼今日之乖隔兮奄與家爲參辰豈相去之云遠兮曾不盈乎數尋何言禁之清切兮欲瞻覩而莫因仰行雲以歔歔兮涕流射而沾巾惟屈原之哀感兮嗟悲傷於離別彼城闕之作詩兮亦以日而喻月況骨肉之相於兮永緬邈而兩絕長含哀而抱戚兮仰蒼天而泣血亂曰骨肉至親化爲他人永長辭兮慘愴愁悲夢想魂歸見所思兮驚寤號

咷心不自聊泣漣師兮援筆抒情涕淚增零許斯詩兮後為貴嬪妾
陋無寵以才德見禮體羸多患常居薄室帝每遊華林輒回輦過之
言及文義辭對清華左右侍聽莫不稱美及元楊皇后崩芬獻誄曰
惟泰始十年秋七月景寅晉元皇后楊氏崩嗚呼哀哉昔有莘適殷
姜妣歸周宣德中闡徽音永流樊衛二姬匡齊翼楚馬鄧兩妃亦毗
漢主峨峨元后光嬪晉宇伉儷聖皇比蹤往古遭命不永背陽即陰
六宮號咷四海慟心嗟余鄙妄銜恩特深追慕三良甘心自沉何用
存思不忘德音何用紀述託辭翰林乃作誄曰赫赫元后出自有楊
弈世朱輪耀彼華陽惟嶽降神顯茲御名祥篤生英媛休有烈光含靈
握文異于庶姜和暢春日操厲秋霜疾彼攸遂敦此義方率由四教
匪怠匪荒行周六親徽音顯揚顯揚伊何京室是臧乃甥乃納聿嬪
聖皇正位閨闈惟德是將鳴珮有節發言有章仰觀列圖俯覽篇籍
顧問女史咨詢竹帛思媚皇姑虔恭朝夕允釐中饋執事有恪于禮
斯勞于劭斯勤雖曰齊聖邁德日新日新伊何克廣弘仁終溫且惠

帝妹是親經緯六宮罔不彌綸羣妾惟仰譬彼北辰亦既青陽鳴鳩告
時躬執桑曲率導媵姬修成蠶族分繭理絲女工是察祭服是治祗
奉宗廟永言孝思于彼六行靡不蹈之皇英佐舜塗山翼禹惟衛惟
樊二霸是輔明明我后異世同矩亦能有亂謀及天府內敷陰教外
毗陽化綢繆庶正密勿夙夜恩從風翔澤隨雨播中外禔福遐邇詠
歌天祚貞吉克昌克繁則百斯慶育聖育賢教踰姁姁訓邁姜嫄堂
堂太子惟國之元濟濟南陽爲屏爲藩本枝菴藹四海蔭焉微斯皇
妣孰茲克臻曰軋蓋聰曰聖允誠積善之堂五福所并宜享高年匪
隕匪傾如彭之齒如聃之齡云胡不造于茲禍殃寢疾彌留寤寐不
康亟咸騁術和鵲奏方祈禱無應嘗藥無良形神將離載昏載荒奄
忽崩徂湮精滅光哀哀太子南陽繁昌攀援不寐擗踊摧傷嗚呼哀
哉闔宮號咷宇內震驚奎者墳嚮赴者塞庭哀慟雷駭流淚雨零獻
歎不已若喪所生惟帝與后契闊在昔比翼白屋雙飛紫閣悼后傷
后早即窀穸言斯既及涕泗隕落追惟我后是聰寔哲通于性命達

子儉節送終之禮比素上世祔無珍寶含無明月潛輝梓宮永背昭
晰臣妾哀號同此斷絕庭宇過密幽室增陰空設幃帳虛置衣衾人
亦有言神道難尋悠悠精爽豈浮豈沉豐奠日陳異魂之臨孰云元
后不聞其音乃議景行景行已溢乃考龜筮龜筮襲吉爰定宅兆克
成玄室魂之往矣于以今日仲秋之晨啓明始出星陳夙駕靈輿結
駟其輿伊何金根玉箱其駟伊何二駱雙黃習習容車朱服丹章隱
隱轡軒弁經總裳華轂曜野素蓋被原方相伋伋旌旄翻翻輓童引
歌白驥鳴轅觀者夾塗士女涕漣千乘萬騎迄彼峻山峻山峨峨曾
阜重阿弘高顯敞據洛背河左瞻皇姑右睇帝家推存撥亡明神所嘉
諸姑姊妹娣姒媵御追送塵軌號咷衢路王侯卿士雲會星布羣官庶
僚縞蓋無數咨嗟通夜東方云曙百祗奉迎我后安厝中外俱臨同
哀並慕涕如連雲淚如湛露局闔既闔窈窕宜其有夜無晝曷用其
明不封不樹山坂同形昔后之崩大火西流寒往暑過今亦孟秋自
我銜卹憐忽一周衣服將變痛心若抽逼彼禮制惟以增憂去此素